



Laudatio für Rita Schwitter-Rüdisüli

10 Jahre Dirigentin Jodelklub Bergfriede Amden

Das Jahr dörfsch du s 10 jährige Jubiläum als Dirigentin vu üserem Jodelklub firä. Da derzuä kört ä chlinä Rückblick i d Vergängäheit. Ich mag mich nu ganz genau erinnerä a di säb HV 2009 im Rest. Burg Strahlegg z Betlis. Dini Wort sind damals gsi: Äs mues öppis go i üserem Klub sus suech ich mir amä anderä Ort ä nüi Herusforderig.

Ich bi grad a derä HV zum Presi gwählt wordä. Da händ bi mir natürli d Alarmgloggä schället. So hän ich dich dänn zämä mit em Vorstand dervo chönä abhaltä der Jodelklub Bergfriede z verlooh. Im Gägäteil mir händ dich chönä motivierä d Dirigentenusbildig in Agriff z näh und dr Klub ab 2010 zleitä. Im Jahr 2013 häsch du dini Usbildig mit Erfolg abschlossä und z Diplom als Dirigentin vom Jodlerverband dörfä entgägä näh.

Viel isch passiert i därä Zyt. Du hesch ghüratä und mit em Urs hesch du ä Famili gründet. Ihr händ zämä äs nüs Huus buä und zwei gsundi Chind händ s Glück komplett gmacht. Trozdam bisch du i all dänä Jahrä wenn immer möglich bi dä Probä und Uftritt für üs da gsi. Du häsch dich a vilnä Kürs immer witerbildet. Im Jahr 2014 häsch du üs fürs Eidgenössisch Jodlerfäscht z Davos vorbereitet. Mit üserem Vortrag händ mir det zämä mit dir d Höchschtklassierig törfä firä.

Nur di wänigschtä vo üsernä Mitglieder chönd sich vorstellä was äs bedüet Wuchä für Wuchä gueti Probä für üs z vorbereitä. Was äs bedüet Text und Melodieä vu üsernä Lieder mit änärä absolutä Gnaugkeit üs bi z bringä. Viel Lob und Erfolg bi üsernä Uftritt git dir aber sicher ä gwüssi Gnuegtuig und au Motivation.

Liebi Rita mir danked dir für: Dini Arbeit – dini Usdur – dis Angaschament – dini Usglichäheit – dini guetä Närvä – dis Durchsetzigsvermögä – dini Fröhlichkeit – und mängmal für dini Nachsicht!!!

Mir danked au a dim Ma am Urs für sini Understützig wenn du wieder mal für dr Klub underwägs bisch.

Mir sind eifach froh, glücklich und dankbar, dass du bi üs bisch und üserem Chor als Dirigentin witerhin treu blibsch.

I däm Sinn gratulieräd mir dir vu ganzem Härzä zu dim Jubiläum und wünschd dir für

Zuekunft nur das Beschti, Glück Gsundheit und Zfriedeheit!!!!

Dini Jodlerkameradinnen und Kameraden